

SA's Leading Past Year

Exam Paper Portal

S T U D Y

You have Downloaded, yet Another Great  
Resource to assist you with your Studies ☺

Thank You for Supporting SA Exam Papers

Your Leading Past Year Exam Paper Resource Portal

Visit us @ [www.saexamapers.co.za](http://www.saexamapers.co.za)



SA EXAM  
PAPERS



# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

**LIBANGA 12**

**SISWATI LULWIMI LWEKUCALA LWEKWENGETA (FAL)**

**LIPHEPHA LESIBILI (P2)**

**LWETI 2021**

**EMAMAKI: 70**

**SIKHATSI: Ema-awa 2½**

**Leliphepha linemakhasi la-20.**

## TICONDZISO KULABAHOLWAKO

Fundza lelikhasi ngembikwekutsi ucale kuperendvula imibuto.

1. UNGALIFUNDZI lonkhe liphepha lemibuto. Buka lokucuketfwe ekhiasi lelilandzelako bese ubeka lumphawu kulowo nalowo mbuto lobutwe ngetincwadzi lotifundze kulomnyaka.

2. Leliphepha lemibuto licuketse TIGABA LETINE.

|                               |      |
|-------------------------------|------|
| SIGABA A: Inovel              | (35) |
| SIGABA B: Umdlalo             | (35) |
| SIGABA C: Tindzaba letimfisha | (35) |
| SIGABA D: Tinkondlo           | (35) |

3. Phendvula IMIBUTO LEMIBILI kuperendvula kunobe ngutiphi tigaba LETIMBILI ngalendlela:

SIGABA A: INOVELI (35 emamaki)  
Phendvula MUNYE umbuto wenoveli loyifundzile.

SIGABA B: UMDLALO (35 emamaki)  
Phendvula MUNYE umbuto wemdlalo lowufundzile.

SIGABA C: TINDZABA LETIMFISHA (35 emamaki)  
Phendvula YOMIBILI imibuto lebutwe ngetindzaba letimfisha.

SIGABA D: TINKONDLO (35 emamaki)  
Phendvula TOTIMBILI tinkondlo lekubutwe ngato.

Sebentisa luhlu lwekutikhumbuta kute usitakale.

4. Landzela ticondziso letisekucaleni kwaleso naleso sigaba.
5. Tinombolo tetimphendvulo atihambisane naletu temibuto njengobe tinjalo ephepheni lemibuto.
6. Cala LESO naleso sigaba ekhasi.
7. Siphakamiso sekulawulwa kwesikhatsi: Sebentisa emaminithi lange-75 kuleso naleso sigaba.
8. Bhala ngesandla lesibonakalako nalesifundzekako.

**LOKUCUKETFWE**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

**SIGABA A: INOVELI**

**Phendvula MUNYE umbuto wenoveli loyifundzile.**

| INOMBOLO YEMBUTO          | EMAMAKI | LIKHASI |
|---------------------------|---------|---------|
| 1. <i>Kwasha Tikhotsa</i> | 35      | 5       |
| 2. <i>Ngenca Yakho</i>    | 35      | 8       |

**SIGABA B: UMDLALO**

**Phendvula MUNYE umbuto wemdalo lowufundzile.**

|                           |    |    |
|---------------------------|----|----|
| 3. <i>Lahloma Ladvuma</i> | 35 | 11 |
|---------------------------|----|----|

**SIGABA C: TINDZABA LETIMFISHA**

**Phendvula imibuto LEMIBILI ngetindzaba letimfisha lotifundzile.**

|                 |    |    |
|-----------------|----|----|
| 4.1 'Lizizi'    | 18 | 14 |
| 4.2 'Sulumlomo' | 17 | 15 |

**SIGABA D: TINKONDLO**

**Phendvula TIMBILI tinkondlo ngencwadzi loyifundzile.**

|                        |    |    |
|------------------------|----|----|
| 5.1 'Silomo Sakuleli'  | 18 | 17 |
| 5.2 'Sihlalo Sebukhos' | 17 | 19 |

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto labafuna kuyiphendvula ngaphandle kwekufundza lonkhe liphepha lemibuto.

| SIGABA  | TINOMBOLO TEMIBUTO | LINANI LEMIBUTO LEPHENDVULWAKO | THIKA (✓) |
|---|--------------------|--------------------------------|-----------|
| <b>A: Inovelis</b><br>(Imibuto lemifisha)   | 1–2                | 1                              |           |
| <b>B: Umdlalo</b><br>(Imibuto lemifisha)  | 3                  | 1                              |           |
| <b>C: Tindzaba letimfishas</b><br>(Imibuto lemifisha)                             | 4.1 + 4.2          | 2                              |           |
| <b>D: Tinkondlo</b><br>(Imibuto lemifisha)  | 5.1 + 5.2          | 2                              |           |
| <b>CAPHELA:</b> Cikelela kutsi uphendvule imibuto lesetigabeni LETIMBILI kuphela. |                    |                                |           |

**SIGABA A: INOVELI**

Phendvula MUNYE umbuto wenoveli loyifundzile.

**UMBUTO 1: KWASHA TIKHOTSA – LL Dlamini**

- 1.1 Fundza letheksthi bese uphendvula imibuto lelandzelako.

**ITHEKSTHI A**

Kumele sihlale etikwetikhali, sivuke etikwetikhali. Sahlaselwa kanye sehlulwa sesiyawuba inkhundla yekugidzela. Onkhe emakhosi latawufuna kuvivinya emabutfo awo atawavivinya lapha kitsi. Sikhatsi asivumi kutsi sigoce tandla sibukele. Uma singakwenta loko kuyawuba ngumlandvo kutsi kwase kwabuswa Mswati,' Kuphendvula Mngayi.

5

'Simunye ndvuna yami! Lakho ngelami Mngayi. Litsini lakho Tikhuba?' Ngemavi aMswati lawo. 'Seyicedzile iNgwenyama yesive. Akwentiwe njengekusho kwayo. Uma singayekela simo sichubeke ngalendlela, batukulu betfu bayawusisola sibili. Siyawuphendvuka inhlekisa eveni lonkhe. Kuyawucanjwa taga ngatsi. Akusukunywe kumiwe ngetinyawo! Kuhlala phasi angeke kusisite ngalutfo,' kuphendvula Tikhuba. 'Ngibonga imibono yenu nonkhe tindvuna tami. Emadvodza akhulumu ngetento kunekwanda ngemlomo,' lawo ngemavi aMswati ekuphetsa inkhulumo yakhe netindvuna takhe. Watsi abe acedze kukhuluma netindvuna takhe wativa anelisekile Mswati.

10

15

'Inkhosi yinkhosu ngetindvuna. Bukhosu buba bukhosi ngetindvuna,' kusho Mswati akhombisa kwetsembela etindvuneni takhe. Kuphaka imphi yakhe abukane netitsa letibucalu naletikhashane bekusho kona kutsi loku lekwentiwa ngebengati yakhe utakubona kamuva. Kulawo malanga bekubona wonkhe umuntfu kutsi iNgwenyama ihlala isemicabangweni lejulile. Umcondvo wayo uyakha ubuye ubhidlite, utsatse ubuye ubeke. Emavi labewasho ngulatsi akukho lokwehlula kubambisana nekutimisela ekwenteni tintfo.

20

Kungayiphaki imphi iphume ngemivilavila bekusho kubhubha kwembuso waboNdvungunye kusale kungumlandvo kutsi kwake kwabakhona umbuso weMaswati.

25

[Likhasi 14–15]

- 1.1.1 Hloba luni lweludvweshu loluvetwa indzima yekucala? (1)

- 1.1.2 Khetsa YINYE imphendvulo kuleti.

Lokuvivinya emabutfo lobekushiwo nguMswati kuletheksthi lengenhla bekusho kuwentani?

- A Kuwatsetsisa
- B Kuwavusa
- C Kuwadlisa
- D Kuwacecesha

(1)

- 1.1.3 Lamavi aTikhuba latsi, 'Seyicedzile iNgwenyama yesive' amveta angumuntfu lonjani ngekxesimilo? (1)

- 1.1.4 Ngumuphi umsebenti lowenta Khubalo abaluleke lapha ebukhosini? (1)
- 1.1.5 Bhala kutsi lomugca longentasi umveta ahlalisene njani Mswati netindvuna takhe.  
'Simunye ndvuna yami, lakho ngelami ...' (2)
- 1.1.6 Lamavi aMswati latsi, 'emadvodza akhuluma ngetento kunekwandza ngemlomo abesibiketelo sasiphi sigameko? Sekela imphendvulo yakho. (2)
- 1.1.7 Ngekubona kwakho ngabe vele Mswati bekuyinhloso yakhe yini kutsi ahlasele banakabo? Usho ngani? (2)
- 1.1.8 Ngusiphi sento lebesenta Mswati atsembe kakhulu tindvuna takhe naleso lesenta angabavisisi banakabo? (2)
- 1.1.9 Sizatfu sini lesenta sitsi teluleko taTsandzile tamsita Mswati? Sekela imphendvulo yakho. (2)
- 1.1.10 Ngabe kuliciniso noma kungumbono kutsi loku lokwenteka kulenovel kusenteka naseveni lesiphila kulo? Sekela imphendvulo yakho. (2)
- 1.1.11 Catsanisa sipheto salendzaba naloko lokushiwo endzimeni yekugcina yalesicashunwa. (2)
- 1.2 Fundza letheksthi bese upholdvula imibuto lelandzelako.

**ITHEKSTHI B**

'Angimange ngikhulume nayinye yemakhosi lawo langihlaselako nyalo. Angiati nawo akangati, kodvwa ayangihlasela. Loku lokwentekako nyalo akunginiketi litfuba lekutsi ngicabange inchubo lekumele ngiyilandzele. Bengisengakakhetsi kutsi ngilandzele yababe yekubusa ngekuthula nome ngilinyakatise live ngiphungwe la nale. Angikacedzi nesikhatsi 5 ngikulesikhundla, kodvwa titsa setingangetjani!'

'Sitawuphephiswa njani sive kulesimo lesefusako lesibukene naso?' Kubuta Sicobolonjwane. 'Kumele ngicabangisise masinyane, ngenca yesikhatsi lesesingimpintjile.'

Lenye inkinga lesibukene nayo yebantfwana baMlambo boBashele naMhlangala labanikitana kuhle kwemphonjane nenja. Kumele ngiyewulamula leyomphi eMambane. Inkinga lenye ngeyesikhundla lengikuso lesifunwa ngebendlu yaketfu,' kusho Mswati akhombisa sibindzi nekukhululeka. 'Kwati labalele kutsi sitawuphuma njani kuletinkinga,' kusho Sicobolonjwane. 10 15

'Somcuba! Uyatvela-ke nawe mnaketfu kutsi simo sibi. Ngiphe seluleko lewubona kutsi sitawusenta siphumelele,' kusho Mswati asagucukele KuSomcuba. 'Sicobolonjwane ngibone sengatsi uyahabisa Ngwenyama. Ngako-ke ngitsi ungetfuki mnaketfu akukho lekuyakuphatamisa esikhundleni lewukuso,' kuphendvula Somcuba amisa Mswati sibindzi. 'Ngibonga emavi 20 akho langimisa sibindzi mnaketfu. Kukhona lesifihlelana kona nawe, Sifikile sikhatsi sekutsi ngiyikhiphe yonkhe imphi yami. Sicobolonjwane!

Hamba uyewubita tindvuna temphi tite lapha masinyane,' kusho Mswati akhombisa kugucubala, kantsi abebukeka akhululekile sonkhe lesikhatsi. Waphuma wayewubita tindvuna Sicobolonjwane. Wachubeka Mswati watsi: 25 'Ingabe loku lokungivelelako kushoni? Babe walibusa ngekuthula waphumelela.'

[Likhasi 6–7]

1.2.1 Khetsa YINYE imphendvulo lechaza loku lokukulomugca lolandzelako.

Titsa setingangetjani:

- A Titsa tihle kakhulu.
- B Titsa tibi kakhulu.
- C Titsa tinyenti kakhulu.
- D Titsa tigijima kakhulu.

(1)

1.2.2 Letheksthi lengenhla imveta akusiphi simo semoya Mswati?

(1)

1.2.3 Ngukuphi lokwentiwa bantfwana baMlambo lokufanana nalokwentiwa bantfwana baSobhuza wekucala?

(1)

1.2.4 Nguyiphi inkinga bekabukene nayo Mswati kulethesthi? Sekela imphendvulo yakho.

(2)

1.2.5 Umbhali bekahlose kubatjelani bafundzi ngalenkhulomo yaSomcuba lets, 'ungetfuki mnaketfu akukho lekuyakuphatamisa esikhundleni lewukuso?'

(2)

1.2.6 Lesicashunwa siyayitfutfukisa yini ingcikitsi yalenoveli? Sekela.

(2)

1.2.7 Uyavumelana yini nalombono wekutsi Mswati uvetwa anesibindzi futsi atetsemba kulenoveli? Sekela imphendvulo yakho.

(2)

1.2.8 Uma sifundza lenoveli nguyiphi inkholo labekholelwa kuyo Mswati nesive sakhe? Sekela imphendvulo yakho.

(2)

1.2.9 Nguwuphi umehluko lokhona kulendlela bekabusa ngayo babe waMswati nalena lekabusa ngayo Mswati?

(2)

1.2.10 Fakazela lenkhulomo lets, 'imphi yemndeni ayingenwa' ubhekise kuSidvwala.

(2)

[35]

**UMBUTO 2: NGENCA YAKHO – JJ Ncongwanne**

2.1 Fundza letheksthi bese uphendvula imibuto lelandzelako.

**ITHEKSTHI C**

Wesuka lapho Mabhunu wavulela tinkhomo watigalela tacondza emadlelweni. Besekatitsatsele yena phela lomsebenti wekwelusa tinkhomo. Futsi bekatelusa ngemdlandla ngobe besekumkhanyela kutsi setakhe. Bekatsi angatibeka emadlelweni bese wehlela emfuleni ayowubuka insimu yakhe yensangu. Ayihlakulele ancutsancutse naleyo leseyivutsiwe abheme lenye 5 njalo ayitsengise.

'Ubomcaphela malume wakho Mshumayeli. Solo wabuya eJozi inhlitiyo yakhe seyabalitje. Uyinhloko futsi nasahoshahoshe lomtfunti wakhe wetinkhukhu. Utsi nakabuya lapho ukhandze emehlo asamancane, umlomo sewuhhwabe shengatsi bekakhuma umlotsa. Lapho-ke akasadli uyawolela nje. Ucedza libhodo lonkhe leliphalishi,' kusho gogo Finishi ngemuva kwekuba Mabhunu asaphumile. 10

'Hhayi ungatihluphi ngami gogo. Mine ngiyahamba ngisayowufuna umsebenti emadolobheni. Enhlitiywani yami ngisafuna kuchubeka nesikolo. Intfo nje kutsi ngite imali. Yingako-ke ngisafuna kubambabamba ematohwana kuze 15 ngitfole bozukwana bekungichuba esikolweni.'

'Buka-ke kube malume wakho ngumunfu ngabe sitsengisa yinye inkomo khona utotfola imadlana yekuyowufuna leyo misebenti phela ...'

'Hhawu gogo ungaze utihluphe ngekucabanga intfo lenjalo. Atsengise inkomo malume? Ngabe ngigezephi angentele loko? Uyambona nawe 20 uvuka indlwabane nakukhulunywa indzaba yetinkhomo. Malume angati kutsi waba njani, ute inyongo nemunfu.'

'Utawubulawa yinhlitiyo-ke ngobe mine angikho lapho. Mine ngeke ngize ngiyilwele intfo ingasiyo yami.'

[Likhasi 120]

2.1.1 Ngubani umlingisi losicaba kuletheksthi lengenhla? (1)

2.1.2 Khetsa YINYE imphendvulo kuleti.

Kusho kutsini kutsi malume solo wabuya eJozi inhlitiyo yakhe seyabalitje?

- A Seyabalula
- B Seyabalukhuni
- C Seyabaludzaka
- D Seyabamanti

(1)

2.1.3 Lokweluswa kwetinkhomo kuveta sippi sibekandzaba? (1)

- 2.1.4 Tinkhulomo taMshumayeli ngamalume wakhe tiveta luphi luhlobo Iweludvveshu? Sekela imphendvulo yakho. (2)
- 2.1.5 Uma ufundza lesicashunwa Mabhunu uvetwe njengemlingisi Ionjani ngekxesimilo? Sekela imphendvulo yakho. (2)
- 2.1.6 Ngusiphi sigameko lesentiwa nguLindiwe Shongwe kuMshumayeli lesenta bafundzi bamhleka nakekika esikolweni saseMajuba? (2)
- 2.1.7 Lesehlakalo sekudzabuka kwelibhuluko laMshumayeli aze ahluleke kusukuma ekilasini siveta luphi luhlangotsi lwemphilo yakhe? Sekela imphendvulo yakho. (2)
- 2.1.8 Mdlalose ubaluleke ngani emphilweni yaMshumayeli? Sekela imphendvulo yakho. (2)
- 2.1.9 Ngemaphuzu LAMABILI veta kutsi Mshumayeli bekahlukumeteka kanjani ngenca yelibalalakhe. (2)
- 2.1.10 Kubeketela kuletsa imphumelelo ekugcineni. Bhala KUTSATFU. (3)
- 2.2 Fundza letheksthi bese uphendvula imibuto lelandzelako.

**ITHEKSTHI D**

Mzukwana atseleka kuleli Mshumayeli, bekahlangabetwe nguMdlalose, Khanyisile kanye nagogo Finishi esikhumulweni setindiza eJan Smuts.

Injabulo leyabakhona lapho ayichazeki. Mshumayeli wabuya sekakhulile alijahandvodza. Lihwanca beligcwele buso kepha lihhulwe kahle.

Beseyihambile iminyaka kugogo Finishi. Nakuye Mdlalose beseyihambile. 5

Kubo lilanga beseliyowushona kantsi kuboMshumayeli naKhanyisile belisaphuma. Liphuma nje, bahlome ngetikhali letifanele, imfundvo.

'Ewu, kube nasekufeni kunje, ngabe kuncono,' kusho Mshumayeli ngesikhatsi basabingelelana. Phela, watsi ngekufika nje Mshumayeli, salukati lesingugogo Finishi satiphonsa kuye. Sambamba. Bagonana. Bacabuzana. Samyekelela. Kweta Khanyisile. Babambana bankonkoshelana. Bagonana. Bacabuzana. Bayekelana.

Mdlalose welula sandla bachawulana waze wasihlukuta kibili katsatfu sandla saMshumayeli.

Bangena emotini emabombo bawabhekisa ekhaya. Emaviki lamabili afikile Mshumayeli, kwahlatjwa imbuti bamentela umcimbi wekumhalalisela, ekuphumeleleni kwakhe etifundvweni takhe. Salukati lesingugogo Finishi sangena esibayeni sabikela labaphasi. Saya nasedlizeni lamkhulu Gendinyoni sayowukhuluma kulo. Senta loku nje siphetse ijazi nesigcoko semfundvo saMshumayeli labuye naso phesheya.

NaMdlalose bekakhona kulowo mcimbi. Wasukuma naye wabeka emavi.

'Siyabonga Mshumayeli chawe lakitsi. Usebentile ndvodzana. Tsine sonkhe siyatigcabha ngawe. Sifuna loku-ke kubantfwabetfu. Hhayi lentfo leseyenteka kulamalanga emfundvweni yetfu. Siyabonga ndvodzana kutsi ulwe kulwa lokuhle.'

10

15

20

25

[Likhasi 194]

2.2.1 Khetsa YINYE imphendvulo kuleti.

Letheksthi lengenhla iveta yiphi incenye yesakhiwo salenoveli?

- A Setfulo
- B Luvutfondzaba
- C Sicakacaka
- D Siphetfo

(1)

2.2.2 Letheksthi isivetela sippi simo semoya? Sekela imphendvulo yakho.

(2)

2.2.3 Bhala KUBILI lokuvetwe kutheksthi lokukhomba kutsi gogo Finishi bekakholelwa emadlotini.

(2)

2.2.4 Lenkhulomo lekuletheksthi lets'i, 'kuboMshumayeli naKhanyisile lilanga belisaphuma' ichaza kutsini?

(2)

2.2.5 Ngekwakho kubona ngabe tintfo tenteka ngasiphi sikhatsi semphilo kuletheksthi lengenhla? Sekela imphendvulo yakho.

(2)

2.2.6 Endzaweni lesihlala kuyo bakhona yini bomake labafana namake waMshumayeli? Sekela imphendvulo yakho.

(2)

2.2.7 Ngekubona kwakho emantfombatane alomuhla afundzani kuKhanyisile? Bhala KUBILI.

(2)

2.2.8 Sincumo saMshumayeli sekuyekela Angela nemsebenti eMelika abuyele emuva ekhaya simveta angumuntfu lonjani? Sekela imphendvulo yakho.

(2)

2.2.9 Ngumuphi umlayeto lowedluliswa ngumbhali ngemphilo yaMshumayeli?

(2)

**SAMBA SESIGABA A:** **35**

**SIGABA B: UMDLALO****UMBUTO 3: LAHLOMA LADVUMA – Z Motsa**

3.1 Fundza letheksthi bese uphendvula imibuto lelandzelako.

**ITHEKSTHI E**

|             |   |    |
|-------------|---|----|
| VUSEMATFWA: | ( <i>Akanamandla ubukeka agula</i> ) Ngibonga kugcwala umlomo wakitsi. Ungikhiphe egodzini! Lomuntfu simfuye lapha esigodlwani nje uyimamba lukhonkhots!  |    |
| TSEMBATIVE: | Uphi nyalo?   |    |
| VUSEMATFWA: | Utse uyabuya nakabuya uyangenyusa vele. Angati nekutsi 5<br>ubhekeph.   |    |
| TSEMBATIVE: | ( <i>Amsukumisa</i> ) Asiphumise kwembane, utate asikhandze lapha. Futsi singahle sihambe kalukhunyana ngobe naku seliyacinisa kudvuma lapha ngaphandle. Ngigwaze balindzisango lababili nangingena lapha, asetsembe kutsi 10<br>basakhuatekile angeke bangilandzele, nekutsi kute longibonile wahlaba umkhosi. Phakamisa tinyawo, jaha!<br>Kubi! |    |
| VUSEMATFWA: | Ewu, kuyala! Phela nendlala seyadla yakhatsala!   |    |
| TSEMBATIVE: | ( <i>Bema</i> ) Ubona kutsini? Ngikwetjatse? ( <i>Litsi manya umbane!</i> )   | 15 |
| VUSEMATFWA: | Ase setame futsi sibone. Hheyi mubi nalombane bo!<br>( <i>Nakatsi uyamphakamisa kungene Qedizizwe.</i> )  |    |
| QEDIZIZWE:  | Wo! Ngamakhos' oJijimeza! ( <i>Ngeluhleko Iwendzelelo</i> )<br>Bayede Makhosi! Bhojongwana ndini, iyaphi inyamazane 20<br>yami?   |    |
| TSEMBATIVE: | ( <i>Abeka Vusematfwa phasi</i> ) Ubute kube ungati yini?   |    |
| QEDIZIZWE:  | ( <i>Abatungeleta ngendzelelo nekutetsema lokukhulu</i> ) Wo!<br>Sekunguwena iqhawe loButfwa kulezinsuku? Uyawubona umkhonto Iona? Udl a fumuka udle silaza, udl a igazi 25<br>lamaghawe! Leli ebeliconsia lapha selipholile, umkhonto ufun ukuhlala ushisa. Thatha ezakho-ke nsizwa sizwan'amandla.  | 25 |
| TSEMBATIVE: | ( <i>Akhweshisela Vusematfwa khashanyana ngaselutsandzane</i> ) Ngulapho ngikhona-ke lapho! Ngite 30<br>ngihlomile-ke Zulu! Vika! ( <i>Bavikisana.</i> )  |    |
| QEDIZIZWE:  | Namhlanje iganel'esokeni Nozinja kababa! Kudala nizenza ababus i ngento engacaci. Lowo ozothola uBukhosi ngozobe ebulwele. Vika! Nanso! ( <i>Avike Tsembative aphindze agadle.</i> )  | 35 |
| TSEMBATIVE: | Anginavu nawe jaha! Yivume! ( <i>Asengaketeleli simhlabe emkhonweni sikhali saQedizizwe.</i> )  |    |

[Emakhasi 61–62]

3.1.1 Nguyiphi inkinga lekahlangabetana nayo Tsembative ngalesikhatsi etama kusita Vusematfwa?

(1)

- 3.1.2 Khetsa YINYE imphendvulo kuleti.  
 Bekasho kutsini Tsembative nakatsi, abaphumise kwembane?  
 A Abaphume ngekushesha.  
 B Abaphume ngemandla.  
 C Abaphume ngekunyenya.  
 D Abaphume ngesineke. (1)
- 3.1.3 Nhloboni yeludvweshu loluphakatsi kwaTsembative naQedizizwe kuletheksthi? (1)
- 3.1.4 Bhala KUBILI lokungenta lesicashunwa sitfokotelwe esiteji. (2)
- 3.1.5 Yini lebeyenta kutsi Imbiba yetsembe kutsi nguVusematfwa labebekwa njengenkhosi yeBatfwa? (2)
- 3.1.6 Lokudvuma nekumanyata kwelitulu kulitjelani tetsamelilwati kuletheksthi? Sekela imphendvulo yakho. (2)
- 3.1.7 Nawufundza lesicashunwa yini lengakuheha kutsi ufundze lomdlalo wonkhe? Sekela imphendvulo yakho. (2)
- 3.1.8 Lenkhulomo lets, 'tibanjwa ngaletikudlako' inamuphi umphumela emphilweni yaVusematfwa? Sekela. (2)
- 3.1.9 Sihloko lesitsi, 'Lahloma Ladvuma' siyahambisana yini nemdlalo wonkhe? Sekela. (2)
- 3.1.10 Sento seMbiba sekuvumela Tsembative kutsi ahambe naKhetsiwe ngabe siyahambisana yini nesikhatsi sanyalo? Sekela. (2)

3.2 Fundza letheksthi bese uphendvula imibuto lelandzelako.

### ITHEKSTHI F

|               |  |    |
|---------------|--|----|
| NDVUKUTEMPHI: | Ufike nini wena lapha? ( <i>Ubeka tikhali takhe ubuyela esihlalweni.</i> )                                       |    |
| MADZANDZA:    | ( <i>Etama kwehlisa kuphakama kwemaphaphu</i> ) Ngiyangena nje 'Temphi'. Ninjani vele?                           |    |
| NDVUKUTEMPHI: | Ucinisile?   | 5  |
| MADZANDZA:    | Hawu? Yebo ngiyangena nje! Nalaba labeme esangweni bangafakaza.  |    |
| NDVUKUTEMPHI: | Cha akudzingeki loko. Kadze sanigcina.   |    |
| QEDIZIZWE:    | E- e! Kungaba kuhle mina ngicele indlela, Zinyane leSilo. Masiyibone ngosuku loButimba leyo nyamazane.           | 10 |
| NDVUKUTEMPHI: | Ayixabene!   |    |
| MADZANDZA:    | Kulungile Zulu, asimise kanjalo. ( <i>Aphume Qedizizwe</i> ) Tjela mine, ukhala ngani-ke lamuhla?                |    |
| NDVUKUTEMPHI: | Kute lengikhala ngako. Ngitse asengitokubona nje ngive kutsi solo mane uyakhiphita yini ngalomntfwanakho ...     | 15 |
| MADZANDZA:    | Ngakutjela kutsi angati lutfo. Ufuna ngikhulume kangakhi?  |    |
| MADZANDZA:    | Uyati angiva kutsi lomntfwanami usikhube kiso ngani loba nemkhosi sewengcile awukabutfoli nebukhosi lobe ubu ... | 20 |

|               |   |
|---------------|---|
| NDVUKUTEMPHI: | (Asondzela kuye kungatsi ufunu kumbeka sandla.)<br>Yewena! Yekela tindzaba letingasito takho uyangiva?  |
| MADZANDZA:    | Cha kumangala nje kutsi sewusikhube kiso ngani nyalo.<br>Kumbe vele awusangitsandzi? Mhlawumbe bacinisile<br>laba labatsi liso lakho selinamatsele kuKhetsiwe, 25<br>iNdlovuka ...  |
| NDVUKUTEMPHI: | Khetsiwe wani? Leyo ntfo leyo! Nganje nje nje ngiyo!  |
| MADZANDZA:    | Nx!   |
| NDVUKUTEMPHI: | 'Temphi', vele uyamphika lomntfwana?  |
| MADZANDZA:    | Uvile nje! Ngiphindze kangakhi? 30<br>Ulahla litsambo lakho? Cha angikushiye-ke. Bengitsi<br>umfula sewubohlile. ( <i>Atsi nase afulatsela agucuke<br/>ambuke atsi</i> ) Ubolibamba lingashoni. Siphundvu<br>sibohlala sibona ngobe labosa ngebumnyama<br>esangweni bangahle bose emantjontjo uwabukile, 35<br>tinyenti kabi tinkhomo letilindze kuHlatjwa. |

[Likhasi 45]

- 3.2.1      Nguyiphi lenkinga lebukene naMadzandza kuletheksthi? (1)
- 3.2.2      Bhala umugca lokhomba kutsi Ndvukutemphi uneludlame? (1)
- 3.2.3      Khetsa YINYE imphendvulo kuleti.  
  
Bekasho kutsini Qedizizwe nakatsi ucela indlela?  
  
A    Ucela kulahla.  
B    Ucela kulala.  
C    Ucela kuhlala.  
D    Ucela kuhamba. (1)
- 3.2.4      Lomdlalo lotsi, 'Lahloma Ladvuma' uluhloboluni Iwemdlalo? Sekela. (2)
- 3.2.5      Lokutsi Madzandza abe nesisu angakashadi kusitjelani  
ngekutiphatsa kwakhe? (2)
- 3.2.6      Inkulumiswano phakatsi kwaQedizizwe naNdvukutemphi  
iyawutfufukisa yini lomdlalo? Sekela. (2)
- 3.2.7      Ngabe umdlali longuNdvukutemphi angafanelo yini kuba ngubabe  
locotfo? Sekela imphendvulo ngalokwenteka kuletheksthi. (2)
- 3.2.8      Khetsiwe abeyintfombatane letiphetse kahle futsi iwayi emalungelo  
ayo. Vuma nobe uphikise lombono. (2)
- 3.2.9      Tfolwane naSigwaca bebatindvuna letetsembekile kuVusematfwa.  
Fakazela lombono ngalokwenteka ngelilanga lesibhimbi. (2)
- 3.2.10     Uyavuma yini kutsi sipheto salomdlalo siveta lebesingakulindzeli?  
Sekela imphendvulo yakho ngemaphuzu LAMABILI. (3)

**SAMBA SESIGABA B: 35**

**SIGABA C: TINDZABA LETIMFISHA****UMBUTO 4: TELUTSANDVO ATIPHESI – JJ Ncongwane**

Phendvula YOMIBILI imibuto lebutwe ngetindzaba letimfisha.

**4.1 'LIZIZI' – JJ Ncongwane**

Fundza letheksthi bese uphendvula imibuto lelandzelako.

**ITHEKSTHI G**

Kwase kuvakele kutsi tifo letinyenti bantfu baseMlambongwenya batifola ematfunjini latsengiswa bantfu labatsite ngalokungekho emtsetfweni. Luku kwatfolakala embikweni lowakhishwa Litiko Letemphilo Netenhlalakahle. Ngobe sandla semtsetfo asikhetsi kutsi uyahlupheka nome cha. NaSibhono lebekadze atiphilisa ngekutsengitsengisa ematfumbu, watikhandza 5 sesimlengele enhloko.

Besekumahlandla lamanyenti dokotela wetinkhomo amnyenti lapha emadzeleni. Bekatsi angefika atsatse bulongo baleyo nkomo letawuhlatjwa ahame angene ehhovisini lakhe khona lapha emadzeleni. Kutawutsi-ke emuva kwamahora lamabili atfumele umbiko kutsi bulongo benkhomo nombolo bani bukhombisa kutsi inesifo. Ngako-ke leyo nkomo ayiyombelwa. Kulapho-ke kwacala kujokotela nekukhonondza kubahlindzi nakuto tisebenti jikelele. Kulapho-ke futsi umnumzane Madoda umnikati wasemadzeleni acinisa khona sandla watsi: akungabikho namunye umuntfu lophuma nematfumbu ngaphandle kwemvumo yakhe. Lotawutfolakala aphuma 10 nematfumbu litakumenela lijele kalangashona, kavalwangekukhiya, kavulwangekukhiya, 15

Wema Sibhono wayibuka inkhabi lenkhulukati ngalelinye lilanga iyombelwa yonkhe nesikhumba sayo ingamane idlelwie inyama. 'Inyanisi tiyadzela tintfutfwane netinondvo tona tentelwa nje lidzili lamahhala,' wakhulumu lamavi 20 Sibhono wacedza wacoshama wokhela lipipi lakhe wabhema.

Kwatsi entsambama nasishayisako sikwati, Sibhono njengemuntfu losala emuva akhiye: watsi uyakhiya kulenyne indlu, wabona kulenga ematfumbu. Wacalata wabona kutsi kute lombonako, kantsi nemLumbi Madoda usaye 25 ngasendlini.

'Mncwi, lelituba leli ngiyalisebentisa lamuhla. Nangipholisa emaseko ngabe kusho kutsi angiyati inhlupheko lengiphetse.'

[Likhasi 89–90]

**4.1.1 Khetsa YINYE imphendvulo kuleti.**

Ngumuntfu lonjani lobitwa ngekutsi lizizi?

- A Ngumuntfu lotsandza inhloko.
- B Ngumuntfu lotsandza inyama.
- C Ngumuntfu lotsandza inyoni
- D Ngumuntfu lotsandza inyanga

(1)

- 4.1.2 Ngaphandle kwekusebenta emadzeleni nguyiphi lenye indlela bekatiphilisa ngayo Sibhono? (1)
- 4.1.3 Letheksthi lengenhla yenteka ngasiphi sikhatsi semphilo? Sekela imphendvulo yakho. (2)
- 4.1.4 Nika sizatfu lesicinile lesenta kutsi bahlindzi bakhonondze ngekulahlwa kwenkhomo yonkhe kutsiwa inesifo. (2)
- 4.1.5 Hloba luni loludvweshu lolutfolakala kuletheksthi lengenhla? Sekela imphendvulo yakho. (2)
- 4.1.6 Ngemaphuzu LAMABILI chaza similo saMadoda ngekubuka indlela bekalichuba ngayo libhizinisi lakhe. (2)
- 4.1.7 Ngumuphi umlayeto longawedlulisela kebantfwini bendzawo ngalokwentiwa nguSibhono? (2)
- 4.1.8 Ucabanga kutsi sento saSibhono sekuntjontja ematfumbu besingeke samfaka ejele na? Sekela imphendvulo yakho. (2)
- 4.1.9 Ngekubona nguliphi litiko lebelingasita Sibhono futsi ngayiphi? (2)
- 4.1.10 Veta tizatfu LETIMBILI letenta sitsi lendzatjana iphetseke kahle. (2)

#### 4.2 'SULUMLOMO' – JJ Ncongwane

Fundza letheksthi bese uphendvula imibuto lelandzelako.

#### ITHEKSTHI H

'Sulu mntwanaketfu, ngicela kutsi ungasaphindzi ungibite ngenkhwela. Lentfo leyo iyangilulata.' Kusho Dzeliwe Mkhonta adzimate abambe elukhalweni. Phela ngalenyne intsambama, Sulumlomo wefika wema esangweni kaMashinini, kamalume waDzeliwe phela, washaya inkhwela abita Dzeliwe. Waphuma waphonseka Dzeliwe. Kwatsi nakatsi uyaphuma emnyango, wahlangana nenja wagilana nayo iphuma itsi kubitwa yona. Yakhala buklewuklewu injia. Yamfakela tinhloni injia waya esangweni asakhophota abuke phasi.

5

'E, uyabona-ke Dzeliwe sengitakwenta njeyi nyalo, ngitawutsi ngingafika lapha esitaladini salapha kamalume wakho, macondzana nelikhaya, ngitsatse litje lelincane ngiliphose etikwendlu. Ngitawujikijela ematje lamatsatfu etikwendlu tikhawu letintsantfu kute nawungakeva kodvwa lesitsatfu ulive. Kutawudzingeka kutsi onkhe emalanga entsambama tindlebe takho uhlale utivulile kudzimate kushaye insimbi yemfica ebusuku.' Kusho Sulumlomo.

10

'Kulungile Sulu, shangatsi lilungile futsi lincono lelichinga lakho kunalokubitwa ngenkhwele shangatsi ngiyinja.' Kusho Dzeliwe. Phela Dzeliwe lona bekancama ngemtimba alingana namalume wakhe nangebudze.

15

Bayichuba-ke leyo ndlela yekubitana sikhatsi lesidze yaba yimphumelelo. Bekutsi lapho nakeva litje litsi thara-thara etikwemathayela Dzeliwe, ageze. Kutsi lapho nakukhala lesibili agcoke atifutse ngemakha akhe lawakhontile i-C.C. Kutsi lapho nakukhala lesitsatfu aphume samuntfu loya ngephandle, endlini lencane phela.

20

[Likhasi 205–206]

- 4.2.1 Bhala BUNYE bubi bekutsi Dzeliwe atsandzane naSulumlomo nalendvodza lehamba ngemoto. (1)
- 4.2.2 Khetsa YINYE imphendvulo kuleti.  
 Asho kutsini emavi aDzeliwe latsi, 'Lentfo leyo iyangilulata'?  
 A Asho kutsi iyamjabulisa.  
 B Asho kutsi iyamkhuphula.  
 C Asho kutsi iyamehlisa.  
 D Asho kutsi iyamdumisa. (1)
- 4.2.3 Bangaki balngisi labakulendzatjana? (1)
- 4.2.4 Nguyiphi intfo lekuletheksthi lengakwenta kutsi ufundze lendzatjana uyofika nayo esiphetfweni? (1)
- 4.2.5 Ngukuphi lokwehlisa sitfunti saDzeliwe kuletheksthi? (2)
- 4.2.6 Itsini ingcikitsi yaletheksthi lengenhla? Sekela imphendvulo yakho. (2)
- 4.2.7 Kuliciniso nobe kuliphutsa yini kutsi Sulumlomo ngumlingisi longenawo emaciniso? Sekela imphendvulo yakho. (2)
- 4.2.8 Catsanisa similo saDzeliwe neselusha loluphila kulesikhatsi sanyalo. (2)
- 4.2.9 Kulingana kwaDzeliwe namalume wakhe ngekwemtimba kudlala yiphi indzima kulendzatjana nawubuka siphetfo sayo? (2)
- 4.2.10 Ngutiphi tecwayiso longacwayisa lusha ngato nawubuka lokwenteka kulendzatjana? Nika TINTSATFU. (3)

**SAMBA SESIGABA C:** 35

**SIGABA D: TINKONDLO****UMBUTO 5: EMATFUNDVULUKA – BB Malangwane**

Phendvula TOTIMBILI tinkondlo lekubutwe ngato.

5.1 Fundza lenkondlo bese uphendvula imibuto lelandzelako.

**SILOMO SAKULELI – VJ Nkwanyana**

- 1 Ngiyawanabela lawo mandl' akho latfusako,
- 2 Ngiwabek' eludzengelweni ngiwatfose,
- 3 Ngelunwali abebovu njemagudvwane,
- 4 Lebeniwatfolela ngetingib' emasimini,
- 5 Nitosonga ngawo ngisekuy'ekwaluseni,
- 6 Neluse tinjongosi netindlulamitsi,
- 7 Tigaluj' ematfunga netihlahlakati
- 8 Tematfundvuluka letibunonganongo njengemshushutane.
- 9 Lapho betigewuke tigewukile,
- 10 Kodvwa nibe nitseleka nato selitsambeme,
- 11 Kujakadvula timbedvula nemakhonyane,
- 12 Banibone neyisa mbamba banikhwive ngemiboyi,
- 13 Lapho wahlomuka njengelubhaca,
- 14 Washantjukela bondlebetikhanyilanga,
- 15 Lebashwal' emachawe lamakhulukati,
- 16 BoSteve Biko lebalentukiswa netayendale.
- 17 Nibangameli bekusikhots' emanceba,
- 18 **Lapho** sabhohoma saviwa beTranskei,
- 19 Basihloma wena chawe lelingundzabamlonyeni,
- 20 **Lapho** wawumise inhlokwan' ulwa njengemamba,
- 21 Nkhosi yami besitawutsini singenaye
- 22 Umsiti lofana naw' asimeme nanoma sonile,
- 23 Simagwal' ekubeni labutsekiswa emanyamane,
- 24 Wasichweba ngaleliphimbo lakho sitinkihlinga.
- 25 Wasihloma timbaca letakleletisa tingcondvo,
- 26 Lebetibhukush' ebumnyameni lobungubona,
- 27 Busigila njengetiphunti sadzedzemelela,
- 28 Kulichitjana lelilele bomokhane netimfundzamakhwela,
- 29 Lesatiphulula kulo sesiphetfwe ngemazeze,
- 30 Lebekasitinyela sivuvuke ngemadlaziyane,
- 31 Kodvwa ngesekufika kwakho silele mbamba
- 32 Lolo shawulo Iwensangu lusisindze tinhloko salala.
- 33 Wena ntentewan' **ulibhubezi** lelisabekako,
- 34 Lamahlatsi ngewakh' ubhodla kanye,
- 35 Kuphume nabobabe ndlovu labaphetse
- 36 **Imicibisholo lekhafula tinhlase**,
- 37 Laph' ingene khon' ubashiya nebunyanga,
- 38 Lapho wawubonwa belive leMaputo,
- 39 Beta batewutselelana kuleyo midzibi yakho,
- 40 Jozi, uyinkunkela Madiba chawe lemachawe.

[Likhasi 52]

- 5.1.1 Hlolo luni lweluchumano lolusemgceni we-18 newe-20? (1)
- 5.1.2 Khetsa YINYE imphendvulo kuleti.
- Bunkondlo buni lobusemgceni lolandzelako?
- 'Lapho **betigewuke tigewukile.**'
- A Imphindwa  
 B Imphindza  
 C Indida  
 D Imvumelwano (1)
- 5.1.3 Sinongo sini lesisemgceni we-33? Usho ngani? (2)
- 5.1.4 Chaza ngekuhleleka kwemigca nemagama kulemigca lengentasi?
- 'Nitosa ngawo ngisekuy'ekwaluseni,  
 Neluse tinjongosi netindlulamitsi'** (2)
- 5.1.5 Khokha umugca lonesidvonsamoya endzimeni yekugcina bese uyasidvwebela. (2)
- 5.1.6 Sonkondlo bekakusiphi simo nakabhala lenkondlo? Sekela imphendvulo yakho. (2)
- 5.1.7 Sonkondlo bekachazani ngemugca we-36? (2)
- 5.1.8 Lomugca longentasi usiletsela sippi sitfombe ngaMadiba?
- 'Lapho wawumise inhlokwan' ulwa njengemamba' (2)
- 5.1.9 Ucabanga kutsi yini sonkondlo angalufaki luphawu emgceni wekucala kulena lelandzelako?
- 'Nkhosi yami besitawutsini singenaye  
 Umsiti lofana naw' asimeme nanoma sonile' (2)
- 5.1.10 Ngabe sihloko siyahambisana yini naloko lokuchazwe inkondlo? Sekela imphendvulo yakho. (2)

5.2 Fundza lenkondlo bese uphendvula imibuto lelandzelako.

### **SIHLALO SEBUKHOSI– JJ Thwala**

- 1 Sewusitfolile sihlalo sebukhosи,
- 2 Kadz' usisimel' ungabutsi shu,
- 3 Wehla wenyuk' imini nebusuku
- 4 Ufuna kuphats' umphakatsi.
  
- 5 Selifikile litfuba lakho-ke manje,
- 6 Livete likhono lakho njengesetsembiso,
- 7 Uvumile ngemlomo kuts' utakumela,
- 8 Onkh' emehlo sekabuke wena.
  
- 9 Usitholile sihlalo sebukhosи,
- 10 Bewungati yini kutsi kushiwoni,
- 11 Sewukhafulela etulu ngatsi uyasukelwa,
- 12 Emuva naphambili awusaboni.
  
- 13 Liholo lakho ligcwala libhavu,
- 14 Inyanga iphela uvil' uvovekile,
- 15 Lokumnadzi kuwe akusekho,
- 16 Ngek' ukuphumisele kulabanye.
  
- 17 Bapholile bontsanga yakho yimphelasontfo,
- 18 Uyehla uyenyuka kuhle kweluhlanya,
- 19 Sewemukwa nemvume yekuvala makhalekhikhini,
- 20 Sihlalo sebukhosи kuhela lesikushisa njengemalangabi.

[Likhasi 80]

5.2.1 Bhala kutsi bunkondlo buni lobudvwetjelwe kulomugca longentasi.

(1)

'Sewusitfolile sihlalo sebukhosи'

5.2.2 Khetsa YINYE imphendvulo.

Hloba luni lwenkondlo lolu?

- A Isathaya
- B I-ephiki
- C Ilirikhi
- D Isonethi

(1)

5.2.3 Sentakutsi lesisetjentiswe emgceni we-2 sishoni?

(1)

5.2.4 Bhala bunkondlo lobutfolakala emgceni we-3 bese uyabuchaza.

(2)

- 5.2.5 Bekuyini inhloso yasonkondlo ngekubhala loko lokushiwo endzimeni yesitsatfu? Sekela imphendvulo yakho. (2)
- 5.2.6 Endzimeni yesine khokha umugca lokhomba kutsi lomuntfu lekukhulunwa ngaye akasawujabuleli lomsebenti wakhe. (2)
- 5.2.7 Nguwuphi umoya lotfolakala kulenkondlo? Sekela imphendvulo yakho. (2)
- 5.2.8 Kunemigca lenemvumelwanosigcino leyecako endzimeni yesitsatfu. Yibhale phasi bese uyayidvwebela. (2)
- 5.2.9 Itsini ingcikitsi yalenkondlo? Sekela imphendvulo yakho. (2)
- 5.2.10 Uyavumelana yini nalombono lotsi bantfu labasebentela umphakatsi abakutfoli kuphumula? Sekela ngelokushiwo yinkondlo. (2)

**SAMBA SESIGABA D:** 35  
**SAMBA SAKO KONKHE:** 70